

Na osnovu člana 12. stav 1. tačka c. i člana 18. stav 1. tačka b. Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04), člana 6. Zakona o ustanovama ("Službeni list R BiH", broj 6/92, 8/93 i 13/94), kao i člana 15. Zakona o zdravstvenom osiguranju ("Službene novine Federacije BiH", broj 30/97 i 7/02), Skupština Kantona Sarajevo, na sjednici održanoj 26. septembra 2007. godine, donijela je

ODLUKU

O IZMJENAMA I DOPUNAMA ODLUKE O OSNIVANJU ZAVODA ZDRAVSTVENOG OSIGURANJA KANTONA SARAJEVO

Član 1.

U Odluci o osnivanju Zavoda zdravstvenog osiguranja Kantona Sarajevo ("Službene novine Kantona Sarajevo", broj 7/98) (u daljnjem tekstu: Odluka) u članu 1. stav 3. mijenja se i glasi:

"Sjedište Zavoda je u Sarajevu, ulica Ložionička broj 2".

Član 2.

Iza člana 10. Odluke dodaju se novi čl. 10a. i 10b. koji glase:

"Član 10a.

Vlada Kantona Sarajevo će razrješiti predsjednika i članove Upravnog odbora, direktora i predsjednika i članove Nadzornog odbora Zavoda i prije vremena za koje su imenovani, ako utvrdi da su odgovorni za neuspješan ili nezakonit rad Zavoda, na njihov lični zahtjev, u slučaju da Skupština Kantona Sarajevo ne usvoji godišnji izvještaj o radu i finansijskom poslovanju Zavoda i u drugim slučajevima utvrđenim zakonom i Statutom Zavoda.

Statutom Zavoda će se precizirati posljedice mogućeg neusvajanja godišnjeg izvještaja o radu i finansijskom poslovanju Zavoda, kao i postupak i način razrješenja predsjednika i članova Upravnog odbora, direktora i predsjednika i članova Nadzornog odbora Zavoda i prije isteka vremena za koje su imenovani.

Član 10b.

Upravni odnosno Nadzorni odbor Zavoda obavezan je da Ministarstvu zdravstva Kantona Sarajevo redovno dostavlja zapisnike, odnosno odluke sa održanih sjednica Upravnog odnosno Nadzornog odbora, a izvještaj o radu najmanje jednom godišnje.

Godišnji izvještaj o radu i finansijskom poslovanju Zavoda sadrži: izvještaj o izvršenju godišnjeg programa rada, izvještaj o finansijskom poslovanju, izvještaj o radu Upravnog odbora i izvještaj o radu Nadzornog odbora".

Član 3.

Upravni odbor Zavoda je dužan u roku od 30 dana od dana stupanja na snagu ove Odluke uskladiti Statut i Pravilnik o radu, unutrašnjoj organizaciji i sistematizaciji radnih mjesta i druge opće akte sa odredbama ove Odluke.

Član 4.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj 01-05-24548/07
26. septembra 2007. godine
Sarajevo

Predsjedavajući
Skupštine Kantona Sarajevo
dr. **Denis Zvizdić**, s. r.